

A FILIPPIEDDU

*C'è, ca, quannu vaiu a Filippieddu,
mi sientu n'àutru, nun è fissaria.
È ... cuòmu si-tturnassi carusiéddu
mmiénzu all'amici a-ffari vucciria.*

*Chi bbiéddi taulati all'aria aperta!...
Truòvu sapura c'avìa pirdutu:
proula, crastagniédddu, pirsicata ...
e-vvinu russu forti e bbriusu.*

*A sira avimu tutti l'uocchi a pampinedda;
ma corcarunu è-ttunnu acchjummato;
ognarunu va-ccircannu 'ng-jazzitieddu
pi sbaniri lu vinu tracuddatu.*

*Viviennu tali vinu a-la-cannata,
iu ruòrmu sempri fora; è-ccosa certa;
mancu s'ammattissi na malattimpata
jaju bbisuògnu r'aviri la cuperta.*

*Li stiddi arrestanu, a luna fa a so via;
sientu i campani ri vaccareddi
chi trantuliannu fanu cumpagnia
assièmi a lu coru ri l'ariddi.*

*Taliu attuòrnu ... pienzu e-ssientu ...
La jampata finìu ... Restanu l'amicizzia, l'alliria;
tra li muntagni e li vuòschi, ariddi e armienti ...
A-Ffilippieddu c'è la veru puisia.*